



PRESS SECRETARIAT

MINISTRY OF THE PRIME MINISTER & CABINET

Apia, Samoa

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: pressesecretariat@samoa.ws

Press Release

12 Iulai 2008

1. Malaga le Afioga i le Palemia i Fiti.

O loo i ai nei le Afioga i le Palemia, Susuga Tuilaepa Sailele Malielegaoi, i Fiti e auai i le fono a le Komiti Faapitoa o Minisita o Malo o le Pasefika ma le Malo lē Tumau o Fiti, e usua i le aso 15 – 16 Mati, 2008.

O le Afioga i le Palemia, o ia foi o le Minisita o le Matagaluega o le Vaifafo ma Fefa'atauaiga, faatasi ai ma Minisita o Vaifafo o Ausetalia, Papua Niu Kini, Niu Sila, Toga ma Tuvalu, latou te faatinoa le vaega o Minisita Sooupu e feiloai ma le Malo lē Tumau o Fiti. O le agaga maua luga ua faatuina ai lenei Vaega o Minisita Sooupu, o se taumafaiga a Malo o le Pasefika e tagatagai i tapenaga a Fiti mo le faataunuaina o lana palota lautele i le masina o Mati 2009, atoa ma le toe faafo'i o le faigamalo i faiga faatemokarasi.

O loo malaga faatasi le Afioga i le Palemia ma le Ofisa Sili o Pulega a le Matagaluega o le Vaifafo, Afioga Aiono Mose Sua.

2. Tofia le Ofisa Sili mo le Pulega o Fa'ailoga ma Tusi Pasi Tauāloa a Samoa.

Ua faamaonia e le Kapeneta le toe tofia o le Susuga ia Fepuleai Sinapi Molī e avea ma Ofisa Sili o le Pulega o Fa'ailoga ma Tusi Pasi Tauāloa a Samoa mo le isi tolu tausaga.

I le faasalalauina ai o lenei avanoa, e to'alua i la'ua sa tuuina ane a la'ua tusi talosaga, ma sa valaauina uma fo'i i laua mo faatalanoaga. O nei faatalanoaga sa faatino e se Komiti Faapitoa na filifilia e le Komiti Faatonu. I le maea ai o iloilogā, ua talia nei e le Komiti Faatonu le fautuaga a le Komiti Faapitoa e toe tofia le Susuga Fepuleai Sinapi Molī e avea ma Ofisa Sili o le Pulega o Fa'ailoga ma Tusi Pasi Tauāloa a Samoa mo le isi tolu tausaga, e amata mai i le aso 13 o Aperila 2008.

3. Faatupeina e le SIFA le Au Netipolo a Samoa.

Ua faamaonia e le Kapeneta le iugafono a le Komiti Faatonu a le SIFA mo le toe faauuina o le faatupeina o le Au Netipolo a Samoa mo taamilosaga netipolo faavaomalo.

E \$250,000 le aofai o le tupe na talosagaina ma e totogi muamua atu le \$125,000 pe a maea le sainiga o le Maliega Fou mo le faatupeina. O le vaega lona lua o lenei fesoasoani tupe ua fuafua e totogiina atu pe a manaomia e le Asosi Netipolo a Samoa.

O taamilosaga faavaomalo o loo fuafua le auai o le Au Netipolo a Samoa e aofia ai: Taamilosaga Netipolo a le Lalolagi e faia i Egelani, Mati 2009; Taamilosaga a Atunuu e Lima a Sigapoa, faia ia Aokuso 2008; ma le Taamilosaga o le Ipu o le Lalolagi a Tupulaga Talavou, faia i le Atu Kuki ia Iulai 2009.

E taua tele i le SIFA taamilosaga e faia i Europa ma Asia ona o fuafuaga faalauiloa a le SIFA, aemaise lava Asia, o le maketi autu lea a le SIFA.

4. Tatala Auala i Faleasiu.

Ua faamaonia e le Kapeneta le polokalame mo le tatalaina aloa'ia o le auala i Tauoo, Faleasiu i le itula e 10 i le taeao o le aso Tofi, 17 Iulai 2008.

O le Saunoaga Autu o le a fofogaina e le Afioga i le Palemia, le Susuga Tuilaepa Sailele Malielegaoi, ma o le O'oti'ina o le Lipine o le a faatino lea e le Minisita o Galuega, Felauaiga ma Atinae Ese'ese, le Afioga Tuu'u Anasi'i Leota.

O lenei galuega sa fausia e le Kamupani o le Lucky Construction i lalo o se poloketi a le Matagaluega o Galuega, Felauaiga ma Atinae Ese'ese.